

Don José Villán Fuertes, Secretario do Concello de Carballo - A Coruña

CERTIFICO:

Que o Pleno da Corporación Municipal, en sesión Ordinaria celebrada en data luns 29 de novembro de 2021 adoptou, entre outros, o seguinte acordo:

"2.- Declaración institucional 25 de novembro - Día internacional contra a violencia contra as mulleres e as nenas. (CIBPS de 23/11/2021).

O Sr. Alcalde da lectura solemne á "declaración institucional con motivo do 25 de novembro, día internacional contra a violencia cara as mulleres e as nenas" dictaminada favorablemente pola Comisión Informativa de Benestar e Participación Social (CIBPS) en sesión de 23/11/2021 e transcríbese na súa integridade.

«Con motivo do 25 de novembro, Día Internacional contra a Violencia cara ás Mulleres e as nenas, un ano máis queremos resaltar que a violencia contra as mulleres segue existindo, en todas as súas manifestacións; física, psicolóxica, sexual, simbólica, social, económica e en todos os ámbitos; familiar, na relación de parella ou exparella, violencia vicaria, no ámbito laboral, e tamén no ámbito social ou comunitario.

Segundo a Lei 11/2007, do 27 de xullo, galega para a prevención e o tratamento integral da violencia de xénero:

Enténdese por violencia de xénero calquera acto violento ou agresión, baseados nunha situación de desigualdade no marco dun sistema de relacións de dominación dos homes sobre as mulleres que teña ou poida ter como consecuencia un dano físico, sexual ou psicolóxico, incluídas as ameazas de tales actos e a coacción ou privación arbitraria da liberdade, tanto se ocorren no ámbito público como na vida familiar ou persoal.

Porque a violencia de xénero Si existe. Dende o Concello de Carballo rexeitamos todos os discursos que defendan a negación da violencia contra as mulleres e nenas ou que rexeiten todas as accións destinadas a súa total erradicación.

O número de vítimas mortais é aterrador. Dende 2003, ano no que se empeza a contabilizar, 1114 mulleres foron asasinadas polas súas parellas ou exparellas.

En 2021 xa son 36 mulleres as asasinadas e 5 menores. (datos a 27/10)

No Centro de Información á Muller de Carballo, en 2021 (ata 27/10), o número de mulleres vítimas de violencia de xénero supón case o 31% do total das atencións.

Dende o inicio da pandemia da Covid-19, os datos revelan un incremento de todo tipo de violencias contra as mulleres e as nenas.

É neste momento de crise cando os avances logrados a base da loita feminista se ven gravemente ameazados. Simone de Beauvoir xa afirmaba, no século XX, "Non esquezades xamais que bastará unha crise política, económica ou relixiosa para que os dereitos das mulleres volvan ser cuestionados. Estes dereitos nunca se dan por adquiridos, debes permanecer vixiantes toda a vosa vida"

Este concello reconece ao movemento feminista e a súa loita contra todos os tipos de violencias machistas. O traballo común entre toda a sociedade é un pilar básico para acabar coas vulneracións de dereitos humanos que se cometen contra as mulleres e as nenas.

Consideramos que a educación é ferramenta principal para a loita contra a violencia machista, polo tanto, debemos incidir na formación para lograr o desenvolvemento integral das mesmas.

Por todo isto o Pleno do Concello de Carballo Acorda a seguinte declaración institucional:

1-Ratificar o firme compromiso de este concello coa igualdade de xénero, dos dereitos das mulleres e das nenas, así como a loita incansable contra calquera tipo de violencia.

2-Manifestar o noso compromiso e apoio a todas as mulleres e nenas que sofren violencias machistas.

3-Rexeitar calquera actitude que negue a existencia da Violencia machista.

Por un Carballo sen agresións. Por un Carballo libre de violencias.»

O Pleno Municipal, por “asentimento” unánime dos membros presentes (20), acorda subscribir a declaración institucional lida e transcrita.”

E para que conste, para os efectos oportunos expido o presente certificado coa reserva establecida no art. 206 do R.O.F., de orde e co visto e praxe do Sr. Alcalde, en Carballo, asinado dixitalmente na data que figura ao marxe.

V. e Pr.
O alcalde